

四庫全書

史部

欽定四庫全書

平定三逆方略卷四十五

康熙十八年五月乙巳

命調福建水師提督伯王之鼎為四川提督

時

上以湖廣岳州水師總兵官萬正色諳習水性令其進
勦海寇特授為福建水師提督故以之鼎調補

四川

欽定四庫全書

平定三邊方略
卷四十五

丁未

詔理事官麻勒吉赴廣西暫轄定南王所屬兵士

將軍穆占奏廣西省城投誠偽將軍劉彥明徐
洪貞線成仁等仍為都統副都統令其總轄藩
下及綠旗之兵頗于事有益

上諭劉彥明等所領投誠綠旗兵內有願歸農者皆令
歸農願入伍者撥入廣西經制兵內其定南王下舊
兵有老弱者裁去不必足從前三千之額數年以來

定南王官兵分散各處收聚甚難宜令督捕理事官
麻勒吉前赴廣西暫行統轄定南王下藩兵有分散
者令其察訪料理一切調度軍務會同將軍莽依圖
等商議舉行其廣西文武各官弁定南王下各官職
名麻勒吉俱察明繕冊以聞劉彥明等為都統副都
統之處俟冊到日再議

辛亥遣副將徐升耀賚

敕招撫王屏藩等

時升耀言願往招撫王屏藩吳之茂譚洪張起鳳等

上命加升耀都督僉事賁

救招撫

諭王屏藩等勅曰自吳逆煽亂以來所在官民多被誘惑陷身賊中莫能自拔朕已洞悉情形屢頒勅諭廣示招徠開以自新之路念爾素受國恩必非甘于從逆或心存忠義遲回有待或勢被驅迫歸化無由朕

甚憫焉茲湖南廣西俱經恢復各路兵馬齊進滇黔
爾所悉知四川一隅皆朕赤子久罹兵燹不得早見
太平每一念及殊多惻然特遣副將加都督僉事徐
升耀前往宣布朕意爾其翻然改悟勿失機會率先
來歸朕必赦其前愆論功叙錄爾無懷疑畏勉圖後
効以副朕定亂安民至意

癸丑

命遣官採購湖廣糧米運赴廣西

時因廣西官兵乏糧議政王等議請令兩廣督撫由廣東設策運糧

上諭不必自廣東輓運令遣戶部賢能官二員採買湖廣米運至廣西軍前其湖廣武岡諸處官兵亦令料理備辦

已未

命大將軍貝勒察尼治澧州以南軍事大將軍順承郡王勒爾錦治荆岳彝襄諸處軍事

察尼奏

臣

等前進荆岳彝襄諸處相隔漸遠調

遣防守事宜必致有悞

上諭大將軍貝勒察尼等親統大兵往前進勦自澧州以南軍務聽大將軍貝勒察尼調度荊州岳州彝陵襄陽等處軍務聽大將軍順承郡王調度

辛酉調大將軍簡親王喇布等兵赴桂林

將軍莽依圖奏桂林相近之兵請速調一支往駐桂林以張聲勢

臣

俟副都統額赫訥兵至貴

縣即前赴橫州以絕柳州南寧之路因遣人趣
馬承廕郭義等速行薙髮

上命簡親王及穆占等兵內撥每佐領三人或四人遣
一副都統率赴麻勒吉所令麻勒吉等統轄鎮
守桂林

六月戊辰

詔雲南提督桑額率湖廣官兵進雲貴

桑額奏新任湖廣提督暫駐彝陵請以彝陵官

兵隸其標下而湖廣提標官兵姑屬臣統領

上諭提督桑額隨大兵進取雲貴其湖廣提標官兵准
入雲南提督標下俟底定之日仍回楚中桑陵鎮標
官兵准為湖廣提標至于隨桑額前往官兵方事勦
賊收疆標下官員可各加銜一等兵卒可動正項錢
糧賞賚以示鼓勵

壬申

詔誅叛弁趙天元

尚之信奏粵東之變起自新會江門江門水師
之叛由于天元一人請以天元賜臣使得明正
其罪立置典刑

上諭趙天元不思圖報國恩乘粵西逆賊侵犯粵東首
獻江門背叛致粵東變亂及粵東歸順後又從逆賊
數犯疆圉今度不能免脫窘困至極方始來降情罪
重大趙天元本係平南親王所屬之人王其立誅之
甲戌削都統覺羅巴爾布職

大將軍貝勒察尼等取巴爾布供辭以

聞

上命議政王貝勒大臣集議議政王等奏言都統覺羅
巴爾布自率大兵往湖廣以來並未前進効力
因其怯懦削去叅贊令其贖罪圖功乃身率大
兵坐駐彝陵大兵既復岳州不乘賊中震駭之
時探其虛實力行勦滅以贖前愆鎮荆山對壘
之賊迄于逃遁竟未之知乃誑云分布官兵進

攻巧為飾辨又不親身追殺逸寇止遣夸蘭大
二人前往其後令巴爾布率領官兵攻取辰州
又遲回瞻顧遷延時日竟不速進致賊復踞辰
龍關得為守備巴爾布怯懦退縮一步不能前
進貽誤大事失機甚多今奉

旨取供巴爾布又不即行認罪據實供招反為巧飾殊
失大臣之體宜將巴爾布都統阿達哈哈番佐
領及所加之級盡行削去羈繫荊州彼所襲其

父拜他喇布勒哈指與應襲之人承襲

上報可

乙亥大將軍順承郡王勒爾錦奏請增兵

上責之

勒爾錦奏前者渡江已簡兵士有馬者攜往所
留守彝陵諸處兵並屬頂補多係無馬今平定
疆土兵力單弱請悉以所有前鋒護軍調益

臣

軍

上諭前令順承郡王等固守荆襄諸處而順承郡王遣貝子準達都統根特等率兵前守荆彝今撤還順承郡王至荆彝令平定歸州巴東乃復請益前鋒護軍惟于身之所在必欲厚其兵力所奏殊屬不合念見在進兵平定疆土除將軍噶爾漢等所統進勦兵外其荆彝諸處所在之兵許酌量調往

戊寅尚之信奏偽將軍馬承蔭等來降

承蔭于五月二十六日率偽將軍郭義偽總兵

齊人龍及僞文武官繳勅印來降之信以

聞

壬午將軍噶爾漢奏暫撤還大兵

上責之

噶爾漢奏臣等率領官兵逼臨賊境見山高路

狹小谿甚多草木叢塞今值六月時多靈雨若
山水暴下則魚貫之兵必至斷絕不能相顧矣
且挽運亦難是以暫撤兵衆俟木落水涸更率

官兵先滅山寇續取興安

上諭噶爾漢自任將軍以來初無勞績惟閒住襄均諸處今當逆賊震動之時遣噶爾漢會同提督等勦滅山寇或有克取興安之機酌便而行乃不率兵破賊以圖報効反稱草木叢塞竟以兵還若此當草木未盛之先亦曾効力前進否噶爾漢不行努力以贖前愆反規避退兵殊屬不合即行嚴察議處但見在統兵進勦俟大兵旋日察議又近日陝西大將軍圖海

奏稱四川逆賊出寶鷄立營則興安之地已空噶爾漢其統兵而前擊破賊寇規復興安諸處毋失機宜

甲申

詔大將軍簡親王喇布等罷發桂林兵仍與安親王岳樂約兵勦賊

先因馬承廕郭義等尚未投誠

上命喇布及將軍穆占等撥每佐領兵或三人或四人遣一副都統率往桂林至是喇布奏稱分兵發

往桂林鎮守永州則

臣

等所部進勦之兵力殊

單弱

上諭今馬承蔭郭義等俱已投誠則平南親王及將軍
莽依圖等兵皆可達桂林簡親王等不必分兵發往
仍與安親王約勦殺賊寇

戊子

敕大將軍公圖海等速取漢中興安平定四川

先是提督趙良棟奏稱湖南已經平定應復漢

中興安

臣

願獨當一路展竭愚忠以圖自効

上命圖海等確議至是圖海等奏稱棧道驛門鎮各口
逆賊率衆來犯據險為營今令提督趙良棟進
臨武寨相機而行俟臣等擊破驛門鎮諸處賊
壘如有進取之機酌量分道而行

上諭湖南逆賊大敗困麇遁走大將軍安親王簡親王
等三路進發平定武岡新寧諸處勦殺賊寇貝勒察
尼等進取辰州順承郡王及將軍噶爾漢等亦從鄭

陽彞陵規定蜀賊又馬承廕郭義等並皆難髮廣西
已平平南親王將軍莽依圖等亦統兵進勦今逆賊
震懾正當勦撫並用之時大將軍圖海與將軍總督
提督等共議亟殲侵犯寶鷄之賊恢復漢興以平蜀
地

臣謹按蜀中山峻谷深道里阻陜地實至險
從來不逞之徒多據為窟穴不易削平是時
湖南逆賊潰遁諸路進兵

皇上料蜀寇聞風必皆震懼若不應機疾進使賊得屯聚一隅據守要害恐蕩平之績非旦夕可致

爰

命圖海等率師迅邁收復蜀疆迨圖海等奏稱賊毀偏橋道途有梗將軍張勇提督孫思克等又請姑止進兵

皇上概弗之許仍下詔嚴趣于是諸將帥始部勒士馬分路並發果奪其關隘殲厥渠豪蜀境悉平

直抵雲貴

皇上洞察賊形深悉機勢以萬全之慮為必勝之謀
審畧淵謨誠諸將帥所不能仰窺萬一者矣

巳丑

詔撤福建內府佐領官兵

大將軍康親王傑書等奏閩中濱海要汛及墩
臺營寨俱綠旗官兵防守滿洲大兵惟駐形勢
之地相為聲援滿洲兵數頗多宜酌量撤還

上諭滿兵既云宜撤當如奏撤回但海氛未靖止先撤
內府佐領官兵一千俟此兵到日再議發往更代

庚寅

詔大將軍安親王岳樂等分路進兵

時侍郎宜昌阿等至湖廣傳

諭諸大將軍等酌議撤兵大將軍貝勒察尼奏言臣察

見在進征常德桃源護軍每佐領各五人有餘
驍騎兵每佐領各七人有餘漢軍共一千二百

餘人綠旂兵共二萬七千餘人其兵足以前進
所有在常德者外藩蒙古兵四百餘人在澧州
者外藩蒙古兵二千三百餘人應行撤還松滋
宜都驍騎兵五百人漢軍一百人綠旂兵四百
餘人足以鎮守疆圉二處所有外藩蒙古兵五
百人亦應撤還其在岳州滿兵每佐領各三人
有餘漢軍共三百餘人俱撤還荊州并入荊州
兵內共成每佐領五人之數伴之鎮守其餘滿

兵每佐領各二人有餘鎮守荊州外藩蒙古兵
二千餘人鎮守岳州外藩蒙古兵六百人亦俱
應撤還大將軍簡親王喇布奏稱烏拉寧古塔
之兵宜遵

旨撤還但新寧諸處見有賊寇請暫留烏拉寧古塔兵
一千二百餘人臣等二支之兵合而為一每佐
領兵各十一人有餘于其中選每佐領八人及
綠旗官兵一萬二千餘人率之前往與安親王

相期進勦新寧賊寇俟破賊之後烏拉寧古塔
兵即行撤還其永州宜撥滿兵無馬者每佐領
三人綠旂兵二千人鎮守令總兵官蔡元等率
綠旂官兵三千五百人鎮守全州其兩支外藩
蒙古兵一千七百餘人應行撤還大將軍安親
王岳樂奏稱臣所統護軍驍騎兵每佐領共十
五人蒙古兵一百餘人簡親王等既進取新寧
臣當率每佐領兵各十一人綠旂官兵一萬人

與簡親王相期進勦武岡東口之賊其衡州宜
留每佐領滿兵各一人綠旂兵一千二百人總
兵官張忠標兵二千人防守寶慶宜留每佐領
滿兵各一人綠旂兵一千人防守岳州宜撥每
佐領滿兵各二人前往與鎮守岳州綠旂官兵
協同防守其外藩蒙古兵應行撤還簡親王等
儻不進取新寧其前欲攜往進勦綠旂官兵一
萬二千餘人及得勝等礮祈發臣軍前以便攻


勦武岡新寧東口賊寇

上諭安親王兵可兩路進取武岡東口簡親王等兵與安親王兵約期進取新寧破新寧賊後烏拉寧古塔兵聽令發還貝勒察尼等兵攻取辰州等處蕩滅寇賊衡永荆岳諸地俱如所奏留兵鎮守其諸處撤還滿洲蒙古兵俱令大臣官員沿途嚴加鈐束

詔送馬至武昌

上諭兵部爾部見飼馬匹及營驛之馬可選擇二千如

例送至武昌令善加芻秣備用



平定三逆方畧卷四十五

欽定四庫全書

史部

平定三逆方略卷

四十六至
五十

詳校官編修

臣曹振鏞

編修

臣裴謙履勘

總校官候補中書

臣潘有為

校對官中書

臣李斯咏

磨錄監生

臣鄧廷曾

欽定四庫全書

平定三逆方略卷四十六

康熙十八年七月壬寅

勅總兵官周邦寧還鎮河內

侍郎宜昌阿等奏大將軍貝勒察尼軍前見有
湖廣經制隨征綠旗兵共二萬七千人宜令河
南總兵官周邦寧還豫鎮守

上諭河南境內遠湖廣督隊之處缺內鄉淅川二縣各

口俱在深山今又值旱災總兵官周邦寧可統標兵
二千五百即還鎮守

癸卯

勅學士孔國公等辛酉之信所部兵赴將軍莽依圖軍
前

時之信奉旨先因患痔由橫州還封川今病
日加有重焉於是臣於六月十八日還會城

上諭令王臣等速行勸撫並施之會尚之信所部往定

廣西官兵令學士孔國岱等盡率赴將軍莽依圖軍
前列日聽莽依圖統攝調遣孔國岱等即同莽依圖
進勦其奮武大將軍印勅仍留與之信

丙午削輔國公溫齊等官爵

先是溫齊等賊遁不追且妄報殺賊之數

上令嚴取供詞以聞至是大將軍貝勒察尼等取供具
奏

上諭我國家由來軍法嚴明曾無虛偽多報首功之事

溫齊乃有罪之人不思効力自贖岳州徒步奔逸之
寇不即窮追且殺賊不過三百餘人與原疏迥異彼
時一等台吉格呀爾圖尚欲追勦賊寇承勝復城乃
溫齊反稱道隘馬疲不可前進選悞退却大悞軍機
可削去溫齊官爵罷其叅贊署副都統達賴削去阿
思哈尼哈番佐領及所加之級喀住削去副都統麻
尼削去護軍叅領佐領及所加之級

壬子

命大將軍貝勒察尼等酌調投誠兵於內地

將軍侯林興珠奏投誠偽總兵王度冲偽將軍

陳珀標兵各一千人見留軍前其父母妻子俱

在雲南恐乘間逸去宣洩軍情請調內地補伍

上諭投誠官兵見隨大兵進勦若盡撤往內地則此後

歸誠者將瞻顧不前大將軍貝勒察尼等身在常德

洞悉情形其有家口在滇實屬可疑者酌量設法撤

至內地補入營伍

癸丑

命撤曩陵襄陽諸處外藩蒙古兵還京

大將軍順承郡王勒爾錦等奏湖南各大將軍
麾下所有蒙古兵已盡遣還其在曩陵襄陽等
處蒙古兵一千七百餘人亦應撤回京師

上命曩陵襄陽等諸處蒙古兵准令撤還於荊州諸處
滿洲綠旗官兵內酌量抽撥鎮守地方又

諭兵部柯鐸等投誠官員遇便一一遣發荊州即傳諭

大將軍王將軍等知之

勅提督徐治都速進歸州諸處勦賊

治都奏設五板船一百艘令彝陵鎮臣胡世英

統之以備水路臣親調官兵偕襄陽鎮臣水陸

並發前赴歸州興山巴東形勝之地勦撫逆賊

上諭所用戰艦督撫等委官速造毋悞軍需徐治都即

偕彝陵襄陽總兵官赴歸州諸處討賊勦撫並用

乙卯將軍莽依圖奏大敗賊於新村西山南寧圍解

初偽將軍吳世琮等圍困南寧日久城中食盡
旦夕且陷投誠偽將軍馬承愐請救總督金光
祖遣總兵官譚昇楊國泰等率兵往南寧援之
已而世琮率衆渡江越嶺於新村西山之巔列
鹿角逆戰莽依圖與將軍覺羅舒恕額楚都統
貝勒等分路撲勦殺賊甚多吳世琮負重傷遁
遂解南寧之圍時金光祖又疏報太平偽知府
林輔世新泰偽泰將何應魁率城內文武官薙

髮投誠

丁巳

命江西湖廣巡撫委官送馬長沙

上諭兵部江西南昌備養之馬二千四百餘匹湖廣武昌備養之馬一千匹移文該撫令遣能員解赴長沙沿途管護勿致缺額付巡撫韓世琦加意飼秣毋令羸瘦馬畢到長沙仍令世琦報部

勅大將軍公圖海速調提督孫思克等平定漢中四川

諸處

圖海奏驛門鎮逆賊既敗即遣兵追勦而賊毀
偏橋無路可通侯提督孫思克趙良棟到日會
議進兵

上諭今逆賊既敗所在震動自宜努力窮追收復疆土
前稱逆賊屯踞寶鷄圖海等欲調各路之兵進勦及
賊敗之後又不乘機撲滅反藉稱賊毀偏橋無路可
通竟爾却還如此懦怯易退何時乃得破賊圖海等

速調提督孫思克趙良棟等平定漢中四川諸處勦殺逆賊毋失機會

勅將軍莽依圖等速發南寧平定雲南

時莽依圖報稱南寧地方險隘輓運維艱議令將軍額楚都統馬九玉帥兵屯駐永淳

上諭今當逆賊震驚搖動之時凡為將帥者各宜不失機會努力疾行滅賊以定疆圉莽依圖等既大敗南寧逆賊吳世琮等自當乘勢直取雲南乃稱南寧險

隘輓運艱難令額楚等往駐永淳懦怯如此逆賊何時得滅滇南何日得平今粵西底定乘賊大創之後芥依圖速調都統希福等兵自南寧取路進勦直抵滇中

八月癸亥朔

勅將軍賴塔兼轄潮州

總督姚啟聖奏將軍賴塔久鎮潮州兵民俱已心服宜仍令兼轄漳州潮州

上諭漳潮係兩省接壤之地將軍賴塔久駐潮州得士
民心當此撲滅海賊恢復海澄之際潮州仍令賴塔
兼轄其後賴塔奏言身在漳州與賊對壘且滿洲大
兵係大將軍康親王統轄潮州地勢遙遠實難
兼轄

上諭成命已頒仍令將軍賴塔兼轄潮州如須用滿洲
大兵許一面酌量調遣一面申報大將軍康親王

乙丑

勅廣西提督哲勒肯率兵赴南寧

哲勒肯奏

臣

駐潯州三合嘴彈壓兩江接應大

兵但慶遠太平思恩三府逼近交趾聯接雲貴

為粵西藩籬今逆寇苗蠻嘯聚負固尚未克復

臣請率兵先往南寧會同將軍相機勦撫

上諭哲勒肯身在地方有保守西粵之責關係甚重今
既統兵前往令速赴南寧偕將軍莽依圖總督金光
祖等乘逆賊震動共議勦撫以靖封疆其原駐潯州

三合嘴之地儻屬緊要總督提督可發兵汛守

丁卯

命大將軍順承郡王勒爾錦分兵固守均州鄖陽諸處
將軍噶爾漢奏稱率兵備總督楊茂勲提督佟
國瑤等進剿興安賊

上諭今正蕩滅賊寇平定疆域之時噶爾漢等率兵前
進均州鄖陽諸處所係甚大大將軍順承郡王等於
荊州岳州等兵內酌量抽調固守均鄖諸處務使無

虞

庚午

詔封馬承蔭伯爵授為昭義將軍

時承蔭既投誠請効力自贖

上因諭議政王等曰原任廣西提督馬雄之子馬承蔭
不忘國恩誠心率衆賫繳偽勅印投誠可嘉應授承
蔭伯爵給與將軍勅印隨大兵進剿其標下應設官
兵等處令理事官麻勒吉等與總督金光祖同馬承

廢確議以聞其餘兵丁有願歸農者安插得所願為
兵者選撥入伍至同來歸附文武官員酌量給劄以
示鼓勵

甲戌以郭義為左江總兵官

將軍莽依圖奏當逆賊圍困南寧時郭義齊人
龍悉力固守數與賊戰非他處投誠者可比今
聞左江總兵官缺員以湖北總兵官傅魁調補
僅念邊疆要地乞以郭義或齊人龍補授茲缺

用開歸誠之路

上諭郭義原任左江總兵官率衆歸誠勤勞昭著仍復
原任齊人龍亦有勞績如有應補之缺聽該將軍題
補其湖北總兵官原缺尚未補人令傳魁仍回原任

庚辰

勅大將軍簡親王喇布等進兵武岡

喇布奏

臣

遣將軍穆占於本月初一日克復新

寧縣今與大將軍安親王杜朗進勦武岡逆賊

上諭屯聚新寧賊寇已遁走武岡簡親王等速統大兵
即會合安親王等兵克復武岡楓木嶺諸處殲滅賊
醜以定靖沅其由鎮遠進平雲貴應行事宜確議以
聞儻逆賊不支屢至遁逃安親王等乘其無措隨行
追躡以期蕩平如賊由武岡遁去烏拉寧古塔之兵
可遣還京師

大將軍安親王岳樂等奏官兵復武岡州及楓林
嶺賊首吳國貴盤踞武岡率偽將軍胡國柱等

以二萬餘賊逆戰隘口將軍侯林興珠提督趙國祚等率兵奮擊大敗之國貴中礮死餘賊棄武岡而遁貝子彰泰等復率兵追及於木衣橋又大敗之遂復武岡州城及楓林嶺

乙丑

命內閣學士佛倫等往湖廣軍前督理糧餉

上諭議政王等曰今我大兵數路並進深入勦賊轉運糧餉殊為重要聞今歲湖南亢旱所運糧餉一時不

前殆未可定令學士佛倫侍郎金鉉并遴選部院賢
能官員前往湖廣同督撫商酌總理諸路大兵糧
餉

庚寅

勅大將軍公圖海等分路進發勦漢中賊平定四川

圖海奏進取漢中興安兵分為四路

臣

與將軍

佛尼勒等由興安進總兵官程福亮為後援駐
守舊縣關諸處將軍畢力克圖提督孫思克等

由畧陽進西寧總兵官朱衣客為後援駐守西
河諸處將軍王進寶漢中總兵官費雅達等由
棧道進延綏總官高孟為後援駐守寶鷄寧夏
提督趙良棟等由徽州之巴都山進臣等於九
月初八日四路並發疏入

上諭今將軍莽依圖等大敗逆賊吳世琮平定粵西進
取雲貴大將軍安親王恢復武岡州楓木嶺擊殺賊
渠吳國貴大將軍貝勒察尼由常德進取辰州將軍

噶爾漢等自鄖陽進取興安宜乘賊處處敗衄逃遁震動之時分路撲滅大將軍公圖海亟統大兵乘機勦滅漢中諸處賊寇速定四川如賊敗走即亟躡其後直搗窮追勿使占踞險要

辛卯

詔責大將軍簡親王喇布

喇布奏

臣

探得安親王大兵已克武岡賊寇敗

遁故

臣

遣烏拉寧古塔兵還京臣統兵一支駐

劄東安縣以將軍印信給與都統穆占令其率
兵一支駐新寧侯

旨

上諭逆賊既敗簡親王等宜統兵隨後速進與大將軍
安親王共破賊寇乃不行追勦反勒兵新寧以致軍
機大誤理應嚴加處分但今統兵進勦侯回師之日
察議簡親王其速率兵士往會安親王平定靖州沅
州諸處侯至鎮遠日平定雲貴事宜定議以聞

平定三逆方畧卷四十六

欽定四庫全書

平定三逆方畧卷四十七

康熙十八年九月甲午趣大將軍貝勒察尼等速
取辰龍關

時察尼遣署前鋒統領蘇祜濟偵視辰龍關賊
勢蘇祜濟還言辰龍關路徑堙塞甚固賊與民
一無所見河渠畢涸大兵不可立營安塘筆帖
式報

聞

上諭今賊勢大敗正在摧破凡為將軍大臣者各宜盡心効力乘賊無措即行追勦速靖地方武岡州楓木嶺係辰龍關後路逆賊必自震動貝勒察尼等遣蘇祜濟偵視蘇祜濟不探聽賊中確音遽報賊與民一無所見復云大兵不能立營規避退縮殊為不合貝勒察尼等其速取辰龍關前至鎮遠與大將軍安親王等兵會共議進定雲貴事宜以奏又

諭議政王等以內厰馬一千匹兵部太僕寺馬一千匹
頒給進取辰州大兵

乙未

勅大將軍安親王岳樂等議分撤大兵之半還京師
上諭議政王等今武岡州楓木嶺俱經恢復賊不能据
辰龍關必至自遁安親王簡親王貝勒察尼所部大
兵皆宜速赴沅州如有破賊機會聽若等酌量而行
大兵宜撤其半還京師到日別撥禁兵更代以休養

之兵力收定餘地大兵作何分撥安親王等確議奏
聞駐沅州候旨

詔賚還京蒙古將士

上諭理藩院蒙古兵隨大兵征勦雖未有奇功顯績然
勤勞數年宜加恩賚今將至京師其將領賜以鞍馬
餘衆各給以羊及諸物宜迎至柏鄉縣將到日令先
期報知遣蒙古內大臣二人前往

庚子提督孫思克奏請暫緩進取漢中興安

上切責之

思克以漢中興安未便進取因列款入奏語涉
矜張

上命內閣兵部大臣傳

諭議政王等孫思克奏稱賊多步行踰嶺登山如履平
地小路曲徑賊所稔知我兵前進恐賊由紆徑潛躡
我後以絕餉道為害滋甚朕思秦地綠旗之兵為數
甚多其中步兵不少且各省綠旗兵向推秦兵精銳

賊能跋涉山嶺我兵秦養有年何獨不能況漢中興
安為秦內地滿漢大兵經行熟悉何得視同絕域見
聞罕及輒荒誕其辭凡勦賊安疆用兵將帥審酌調
遣前後籌畫其運餉後路恐致斷絕必詳度以合機
宜乃一定之道也儻以賊間道潛來斷絕餉道為憂
怯懦不前則永無破賊之日矣又疏言大將軍公圖海
分滿漢兵為四路雖分賊勢終憂兵單綠旗兵每人
止有一馬且未必皆強壯可用之兵惟滿洲大兵堪

任第為數無多雖欲另調又恐秦地三邊番彘甚衆
當此秋高馬肥思逞之候實無兵可調不若俟來春
二三月間塞外草尚未生水泉猶涸之時多調邊兵
以資戰守各路進發朕思秦中滿兵不少綠旗兵較
各省更多今稱兵力單弱顯屬畏縮憚於進兵且各
省綠旗兵止一馬曾無多給而且越境征勦粵東粵
西閩楚諸處今又進定滇黔較之平定境內漢興勞
逸何如耶向者凡將軍提鎮募兵時必選精壯勿使

濫收充數定例嚴明今若以秦兵皆非強壯難以應
用則孫思克職任何事觀此則欺蔽之情更顯然矣
且有太將軍公圖海在彼乃妄議大兵多寡殊屬狂
妄又云番彝之人馬肥思逞欲俟來春二三月間草
枯泉涸之時進取設或二三月間進取之後四五月
間番彝馬肥思逞將若之何正值秋成涼爽各處賊
寇大敗震驚之餘不速行平蕩反欲於來春青黃不
接之時進取是又何意也又奏稱秦省大半皆山地

瘠民貧不產粳稻所種惟粳麥菽豆之屬向有捐納
一事稍裨用兵今例已停罷民受採買之苦且山路
險阻必資負載駝運其僱賃之價數倍於應輸之賦
今各路需餉甚多山徑狹隘輓運維艱時當初冬草
枯葉落畜牧無資欲俟來春調集官兵務期兵強糧足
共圖進取者職此之故朕思粵東粵西諸省山嶺亦
多何曾預備糧餉官兵豈有止食稻米不食他粟之
理至於捐納各省俱停止留粵西事例以資平滇軍

需之用自定秦省數年以來未曾勞民轉運且漢興雖多險阻乃陝西內地非隔省百姓轉輸可比今恐輓運累民至春又誰為轉送耶當逆賊敗遁之時急令進兵者正為早定地方以安百姓耳採買恐累於民巡撫杭愛題奏已經改定今以請開事例轉運維艱為辭其規避進兵明甚又疏稱八旗出征官兵今年七月二十八日京師地震房屋傾壞壓斃人民聞之皆蹙額相顧人各懷內顧之憂臣所以暫停進取

以回天意俟人心稍定再議進兵未晚朕思八旗官
兵世受豢養朕之加意臣僚士卒尤為渥厚不特房
屋傾圯細故即赴湯蹈火誼亦難辭孫思克封疆大
臣凡事不加詳察妄言人情皆動以惑軍心殊失大
臣之體細察孫思克疏內前後情由惟耽安逸怯於進
兵列款巧奏且自秦省有事孫思克等係封疆大臣
俱應按律議處念同大兵進勦宥過計功給以世襲
之官加以不次之擢當捐軀報國破賊安疆自請前

進効力乃孫思克身任提督統轄全師不思奮力前進反煽惑滿漢動搖民心飾辭妄奏深負朕擢用之恩情罪殊屬可惡其令翰林學士喇薩禮速往嚴取口供來奏未幾喇薩禮具辭還奏

上曰孫思克理應嚴察治罪但今方統兵與大兵分路進剿俟事平之日再議

壬寅

命留湖廣總督蔡毓榮及司道官於鎮遠協理糧餉

學士佛倫等奏大兵進取辰沅不久即至鎮遠
臣等先於荊州常德澧州諸處預備進黔兵餉
黔地人夫不足將湖南人夫作何分派運送宜
會同酌議請留湖南巡撫韓世琦與臣同駐鎮
遠

上諭總督蔡毓榮酌量留司道各官同駐鎮遠協理糧
餉學士佛倫等奏運致兵餉招徠民人事宜
上從之

佛倫等奏察鎮遠至黔中不通水道非僱募人夫擔負陸運必至有誤大兵糧餉是以臣等與雲貴督撫等共商作何派集人夫酌量定議由鎮遠至黔中令臣等所攜官員筆帖式同司道及賢能府州縣各官酌量安塘數處預集人夫聯續起運抵黔預為之備其大兵到滇支給事宜令黔撫楊雍建同滇中督撫等公同料理但黔民稀少且值逆賊叛亂未必不多流亡如民

夫難於催募請令將軍會同該督撫商議并請
勅將軍及黔中督撫撫綏招徠彼土人民令民互相貿易庶於糧餉有裨

上命如所請行之

甲辰復定南王下投誠官原職

理事官麻勒吉等疏稱劉彥明等投誠官兵八
千餘人悉已安插得所偽官傅奇棟袁鳴佩等
家屬俱在雲南子身來歸請加安插

金史卷之八十七
卷四十七
上曰定南王藩下官員及投誠官員未變之先察係何
官即留其原官職銜其餘愿為兵者補入本省各營
愿為民者許令歸農務俾得所

丙午

詔加馬九玉太子少保授王承業等為援勦營副將叅
將

將軍莽依圖奏靖南王下都統馬九玉等所屬
官兵遣令平定廣西自至臣軍以來管副將事

王承業管叅將事李雲曹應鵠張朝瑞童茂等
首舉逆賊吳世琮書札且擊殺賊寇救援南寧
得彼之力為多進勦雲南時儻不攜若屬以往
則如此整練精兵得之甚難但彼等俱未給有
定銜指有定缺恐或不能實心奮力請量給官
職并都統馬九玉酌量鼓勵庶深入勦殺實為
有濟

上命議政王貝勒大臣集議議政王等奏言察王承業

等隨同大兵進勦廣西逆賊著有勞績宜將五
營官兵設為援勦營王承業李雲曹應鵠張朝
瑞俱授為副將童茂授為叅將其所屬官員俟
該將軍具題到日聽兵部議覆都統馬九玉係
旗下官員俟叙滿洲官員之日一併議叙

上諭馬九玉自閩中以至兩粵同大兵効力可嘉其加
太子少保餘並如議

辛亥

命大將軍簡親王喇布帥師赴廣西桂林駐守

將軍莽依圖奏湖南大兵見在武岡諸處禦敵

臣等一軍先向雲南進發則廣西恐有他虞

上諭桂林要地宜發滿兵防守議政王貝勒大臣會議
具奏議政王等議定據將軍莽依圖咨文都統希福
等已罷往南寧從賓州桃屯之地還守桂林宜
令希福姑駐桂林鎮守莽依圖平定廣西境內
未靖之地

上諭希福所攜兵馬若駐守桂林則莽依圖所部前進之兵不免單弱宜令大將軍安親王簡親王等以上三旗及簡親王所屬王府佐領兵盡行撥發併添撥每佐領下甲兵或二人或三人令簡親王親率速往桂林駐守令副都統布舒庫叅贊簡親王到桂林日希福悉率所部兵會莽依圖前進恢復疆土內大臣阿密達都統穆占會安親王公同商酌而行俟到沅之日其分兵遣還事宜定議以聞

甲寅

命械祖澤清來京

總督金光祖奏官兵分路搜山於八月十七日
擒獲祖澤清并其子良楸

上諭逆孫祖澤清背負國恩屢行反叛情罪重大命平
南親王總督巡撫遣官械送澤清父子及家人來京
十月乙丑

命內大臣侍衛坤巴圖魯等還京師副都統博霖隨大

將軍簡親王喇布率兵前進

上諭兵部曰內大臣侍衛坤巴圖魯都統畢力克圖侍
衛榮和托等出師日久年已衰邁不能馳驅左都御
史舒超患病果真此等實繁衰病大臣官員可察明
撤回京師至副都統博霖等兵見駐南雄今南雄已
為內賊博霖甫往未經効力且大將軍簡親王兵少
遑寧可率其衆前赴廣西吉安所駐滿兵亦令前赴
大將軍安親王軍前如有非要地而駐兵者俱察違

用兵所在俾之進勦可移文諸路大將軍將軍等各
察所部列名以聞大臣官員稱病留止城邑者亦令
察明具奏已而大將軍公圖海奏稱坤巴圖魯覺和
托二人遵

旨令還京師外臣等於十月初二日四路並進已近賊
境或仍撤彼還京或俟恢復漢中興安之日遣
還伏候

睿裁

上諭畢力克圖侯恢復漢中興安之日遣還京師

戊辰

命大將軍康親王傑書等速議撤還福建大兵之半

上諭議政王等福建滿兵為數甚多可否撤還其半其
移咨大將軍康親王靖南王各將軍大臣督撫提督
等公同酌議如克取廈門諸處及鎮守地方雖撤滿
兵之半尚可足用宜令何人統率回京其留守之兵
何人統率以及滿兵撤還之後俾必無他虞令還京

及駐守之人詳議具保限四十日內具題

命將軍噶爾漢等從上津進兵與大將軍公圖海夾攻

興安

噶爾漢等疏稱臣等帥兵至白河縣偵知前路

險阻山徑狹隘馬匹難行因復商酌簡選兵馬

從上津路進發

上諭將軍噶爾漢總督楊茂勲提督佟國瑤身臨賊境

深知其地險要可從上津一路進師視陝西大兵進

勅之會與大將軍公圖海等夾攻興安賊寇迅復疆
土可移咨圖海知之

辛未遣內閣學士希福等齎

勅趣諸路統轄綠旗官兵將軍大臣等分路進勦立功
學士希福郎中烏黑齎

勅赴陝西

勅諭曰

皇帝勅諭將軍張勇王進寶提督趙良棟孫思克自逆

賊吳三桂背恩反叛遣發大兵各路征勦平定疆圉
撲滅賊寇湖南廣西福建諸處以次恢復餘賊逃潰
盤踞水陸險阻冀圖抗拒若爾殘寇雖無煩速勦不
久自當殄滅但朕軫念民生急於拯救令其得所故
欲掃除餘孽以靖土宇今賊既敗遁負險無容專恃
馬兵若用綠旗步兵之力於滅賊殊為有濟況我綠
旗兵較之賊兵甚強爾等素受國家厚恩勦力行間
樹績邊疆甚多殫矢忠貞圖報恩眷朕所悉知爾等

當各率所屬綠旗兵作何調度始能恢復其詳議具奏如爾等盡力報効恢復漢中四川朕必不拘成例優與加恩爾等官兵前進則滿洲大兵亦即相繼進剿接運糧餉不致匱乏茲事所係甚為重大速詳加酌定以聞又令希福等傳

諭張勇等曰自古漢人逆亂亦惟以漢兵剿平彼時豈有滿兵助戰哉今逆賊大敗乘此逃散之際理宜速定四川天下綠旗兵無如陝西強壯而其數較各省

倍衆在陝西大臣官員又皆具有才能將滅之寇何
難勦除爾等不即平定四川豈緣爾等名位事權輕
與儻謂地屬險隘自古以來險隘之地若不攻取豈
有自定之理作何調度官兵幾路進勦事宜確議以
聞又遣給事中莫洛郎中宜爾赫圖齎

勅赴湖廣詹事庫勒納郎中額爾赫圖齎

勅赴廣西其

勅諭大指畧同

已卯

詔將軍巡撫傅宏烈駐鎮會城選調標兵進剿

宏烈奏粵西運雲貴有二道一由南寧將軍莽依圖已遵

旨統滿漢大兵前進矣臣愿由慶遠一路親率官兵直取雲貴

上諭粵西初經恢復傅宏烈仍駐會城同理事官麻勒吉等平定境土撫綏百姓供應大兵糧餉其傅宏烈

標下官兵可選精銳聽王與將軍進勦調用

壬午將軍侯張勇奏請暫止勿進漢中興安

上不許

張勇疏言時屆寒冬堅冰載路轉餉為艱祈暫
止陝西兵進征漢中興安及進取荊州常德衡
州永州廣西諸路兵馬俟明春再行齊發

上曰近閱大將軍公圖海等奏分兵四路進取漢中興
安而諸路大將軍將軍等各領大兵相機勦賊平定

金史卷之八十七
卷四十七
疆圉將軍侯張勇所請不准行

命招撫賊黨王屏藩等

上諭議政王等曰背恩反叛之罪在吳三桂其吳應麒胡國柱等咸係附和之人今雖諸路賊寇敗遁破滅在即朕俯念黎民早欲使疆圉平定其吳應麒胡國柱夏國相王屏藩馬寶郭壯圖各書勅一道分發各路大將軍將軍總督提督巡撫等招撫

碩招撫勅諭曰

皇帝勅諭王屏藩胡國柱馬寶郭壯圖夏國相吳應麒
爾等本係吳三桂藩下之人曾受世職當三桂反叛
時爾等率同逆黨抗拒大兵其後力窮敗遁今復竊
踞一隅遲迴觀望荼毒生民茲湖南廣西漢中俱經
底定賊勢摧敗殄滅可期爾等所明知也每念滇黔
皆朕赤子久罹兵燹不得早見太平朕心殊為憫惻
今特降專勅詳加開諭爾等若悔罪歸誠其從前抗
拒之罪悉為赦免仍論功叙錄至爾等標下將士如

同心歸順亦概從寬宥酌量加恩但念繫戀父母妻
子人之常情或因父母妻子尚在滇黔心懷瞻顧爾
等皆掌握兵柄之人非微末將弁且爾等彼此無不
洞悉若即率所部兵徑還雲南誰能阻遏如爾等一
路兵馬果能先退諸路亦必相率遁逃誰能自立大
兵到日相機接應不特保全家口亦可建立功名或
能開導吳世璠共來歸順厥功尤懋煌煌諭旨炳如
星日朕不食言近日歸順各員朕皆赦其前罪論功

錄用亦爾等所知爾等其盡釋疑衷勉圖後効以副朕懷遠矜全至意又

諭兵部今茲招撫與往者不同因彼情實昭然故特頒勅書令各大將軍將軍等加意曉諭以革其心勿得視為泛常爾部即移咨各大將軍將軍等實心任事務達賊營通行曉諭

戊子

詔卹死事都統伯伊里布等

上諭戶部曰都統伯伊里布在朕左右久知其人率兵出征殊多勞績原期凱旋之時仍與相見忽聞陣亡深軫朕懷今恐喪費不給特賜銀六百兩護軍統領哈克三陣亡且勞績可嘉部卹之外再給內帑銀五百兩

將軍王進寶奏恢復鳳縣諸處

是月初八日進寶等率兵進取四川與賊戰於利橋紅花鋪諸處敗之斬殺甚衆遂復鳳縣兩當

縣

唐寅提督趙良棟奏復徽州

時良棟欲取徽州由密樹關一路以正兵攻險
要設遊兵於黃渚關以牽賊勢及抵密樹關連
戰敗賊即從紅川前進別遣官兵取徽州賊不
能支遁走遂復州城

平定三逆方畧卷四十七

欽定四庫全書

平定三逆方畧卷四十八

康熙十八年十一月壬辰朔

勅巡撫李天浴同廣西兵進剿

先是

上特遣大臣往廣西湖南陝西令王將軍總督提督等
詳議勦滅賊寇事宜具奏至是總督金光祖奏
言今方自粵西進取雲貴而雲貴督撫提督俱

見在湖南請於諸臣中酌分一二來粵以資彈壓

上諭雲南巡撫李天浴可前往廣西同王將軍等進剿并撫定新復地方

甲午

命減撤辰溪兵還京師

大將軍貝勒察尼疏稱全撤屯駐辰溪大兵量留防守桃源常德澧州每佐領十人其八人有

奇令都統鄂鼎等率之還京師

上諭每佐領兵可撤還六人鄂鼎熟諳軍務其留之軍
前更擇以次人員令率兵還京辰溪乃已得之地不
可輕棄仍加意固守貝勒察尼等今方與賊對壘所
撤之兵雖少而湖南諸處初經底定投誠官兵甚多
恐乘此撤兵之際或有他虞察尼等宜密加防守每
事相機詳慮而行

乙未

詔封蒙古郡王固祿為親王

上諭議政王等多羅郡王固祿當榆林總兵官遣使請
兵不及候旨即調兵應援及聞神木變叛又即遣其
子統兵先行嗣復力疾親往為國効力撫降神木縣
固祿可封和碩親王

丙申將軍王進寶奏克武關

進寶率官兵至武關距五里許賊恃險拒敵我
兵奮勇前進斬殺甚多擒偽總兵羅朝興等遂

奪其關

戊戌將軍王進寶奏復漢中

進寶統兵於十月二十七日追勦賊衆直抵漢中賊渠王屏藩引賊兵自青石關遁廣元我兵遂復漢中府城復遣官兵追擊直抵青石關

庚子

勅巡撫張朝珍發兵赴提督徐治都軍前

治都奏請調發撫標官兵及武昌漢陽各營官

兵

上諭將軍王進寶統率官兵于棧道險峻之地屢敗賊寇直前恢復漢中逆賊王屏藩所部之賊不及千人已經敗遁今當逆賊敗奔震動之時進定四川最為重要著如徐治都所請令巡撫張朝珍調標兵千人併武昌漢陽營兵一千二百人速行遣發如或稽延治巡撫以貽悞軍機之罪儻治都遲滯不進亦以貽悞軍機之罪罪之

趣大將軍公圖海等進兵

提督趙良棟疏稱

臣

率兵敗賊於打火店王家

臺追抵白水江賊在在拒守于十月二十五日

夜官兵始排險渡江惟是三路官兵不知遠近

而臣以一旅尾擊而前似已深入儻少遲延萬

一蜀糧得至賊心一堅復出守險則再進甚難

上諭曩者大將軍公圖海奏言彼親率將軍佛尼勒等

由興安路進將軍畢力克圖提督孫思克等由畧陽

路進將軍王進寶等由棧道路進提督趙良棟由徽州路進今王進寶擊敗棧道之賊直前恢復漢中趙良棟擊敗賊衆恢復徽州直抵畧陽惟圖海畢力克圖等兩路之師如何擊賊已抵何所迄今尚未報一審問且畢力克圖等未至所指之地而趙良棟已抵畧陽彼等所行者何事當此逆賊搖動之時圖海畢力克圖孫思克等可速統兵勦賊進定疆圉各路之兵令互通音問又王進寶趙良棟等統兵深入已經

題報而圖海畢力克圖等兩路之兵竟未奏達情形
可速以其故明白奏聞至趙良棟兵既已深入畢力
克圖孫思克等速統兵繼其後以進儻若遲緩不前
致有隔絕即以遲悞軍機之罪罪之未幾良棟奏敗
賊於巴都山恢復畧陽

勅將軍尚之孝勦建寧賊

之孝奏據大將軍康親王咨福建江西接壤之
地尚有逆賊江機楊一豹擾害建寧邵武諸處

令臣速進兵勦滅臣星夜至汀州整頓甲兵進

勦

上諭尚之孝速先平建寧諸處之賊仍遵前旨率兵赴江西與總督提督等共商勦撫江西餘寇未幾江機楊一豹等相繼投誠

辛丑

嚴勅陝西總督巡撫等轉運進蜀大兵糧餉

上諭戶部前者大兵進勦四川已破朝天關直抵保寧

恢復在邇因周有德張德地席卜臣駐廣元不能竭力轉運糧餉達之軍前陝西總督巡撫亦不竭力輸運糧餉致大兵乏食難於久駐遂爾却回貽誤軍機關係重大此數年以來使逆賊逋誅封疆未復兵民苦累休養無期皆周有德張德地席卜臣陝西總督巡撫怠玩遲延之故每念及之深可痛恨今大兵分路進取已恢復漢中不日前抵蜀疆相繼勦撫底定可期軍前糧餉最為重要其令陝西督撫諸臣殫心

經理設策輸運務使士馬飽騰捷音早奏以副朕定
亂安民至意如督撫諸臣漫不經心泄泄從事致饋
餉缺乏有誤軍機俱以軍法從事決不姑恕爾部連
傳諭遵行

甲辰

諭諸將大臣收復四川防守陝西機宜

上諭議政王等曰將軍王進寶副朕超擢顯用之意親
統官兵冒險前進首先恢復漢中提督趙良棟亦副

朕優擢之意親統官兵恢復徽州隨取畧陽彼等皆
報朕之恩實心効力今乘此破賊之勢即恢復保寧
平定四川亦有何難進取漢中各路總兵官所部官
兵王進寶趙良棟等作何調遣前取保寧平定四川
可詳加定議知會大將軍酌量而行大將軍公圖海
率領大兵之半屯駐鳳翔防守陝西通省以護軍統
領烏丹為將軍率大兵之半為王進寶趙良棟後殿
務俾糧餉無或斷絕與總督哈占等會議而行提督

孫思克止率其所部兵駐防原守汛地湖廣提督徐治都連統舟師乘茲勝勢沿江直取重慶將軍噶爾漢總督楊茂勲提督佟國瑤等已進興安迄今尚未奏捷怯懦已甚俟恢復興安之日噶爾漢等俱撤還原守地方前所有功績盡行削去該部嚴察議處噶爾漢佟國瑤令駐防鄖陽諸處楊茂勲率所部官兵連自鄖陽啟行由荆門當陽迅至彝陵與徐治都直從江上流而進奮力平定四川以贖其罪及大將軍

公圖海等恢復興安

兵部遵

旨議將軍噶爾漢等罪以

聞

上諭噶爾漢即宜嚴加處分第見守地方暫停議罪俟
事平嚴加處分佟國瑤免削前守鄖陽功留其所加
太子少保楊茂勲到後佟國瑤所建功績俱行削去
亦削楊茂勲所加一級

詔給都統馬九玉官兵俸餉如滿洲官兵例

將軍巡撫傅宏烈奏靖南王藩下都統馬九玉

兵隨征遠涉支行餉九錢未足給用

上諭馬九玉率兵自福建赴廣東廣西今又同大兵進

平雲貴令如滿洲官兵例支給俸餉

乙巳

勅陝西諸將大臣收集糧餉

上諭戶兵二部前據大將軍等疏稱王屏藩諸賊於漢

中興安諸處擁衆數萬堅守抗拒以此推之必廣儲糧餉為數年之備今我大兵驟入恢復之地賊所聚糧必已多得當此逆賊軍敗懷疑人心渙散之會削平地方似尚不難惟蜀路運糧最為重要宜於所復城池村落遍訪賊積米穀悉行察收俾進蜀官兵不誤支給則於國家大事裨益非細諸將軍大臣等俱宜殫心儲備所獲漢中諸處錢糧米穀節省支用副朕滅寇安民至意此後所至之地惟宜以此為急務爾

部即遵諭速行

臣謹按是時大兵分道進蜀需餉殷繁山路險隘轉輸非易

皇上以軍糈所關至鉅度蜀寇擁衆屯踞必蓄數年之食與其千里輓運不若藉其所有以裕軍儲乃

諭陝西將軍大臣于入蜀之後察訪賊所積糧徧行簿錄撙節支用因而我兵進勦士馬飽騰不虞

匱乏而秦蜀之民亦免供億輸輓之累兵法所
云因糧而敵者正謂此也

己酉

詔總督蔡毓榮修治船艦

毓榮奏辰沅水路直達武陵賊踞上游于白溶
諸處泊船最多賊既依陸路之險又從水路窺
伺若我師悉由陸路進攻恐賊順流以襲我師
之後

上諭賊據水路我師船艦不可不備該督其動支正項錢糧造八漿小船二百配撥官兵水手舵工訓練熟習以濟勦禦

壬子遣郎中蘇赫臣往赴總督楊茂勲進兵

上諭議政王等曰今將軍王進寶等率領官兵直入恢復漢中諸處逆賊王屏藩等分道敗遁當此蜀賊震動之際速由重慶夔州進兵則恢復蜀省不難今湖廣船艦已成前雖有旨令提督徐治都等率舟師溯

江而上直取重慶又令總督楊茂勲速往會徐治都
協力進剿恐復觀望遲延亦未可知宜簡部院堂司
官往趨進兵其情形并令不時具報議政王等會議
以

上諭最當請

簡大臣官員遣往

上命郎中蘇赫臣赴楊茂勲軍前趨兵速赴彝陵尅期
前進并令與茂勲同行不時偵探軍情以聞

甲寅趣將軍烏丹等速統大兵隨提督趙良棟後
進定四川

時良棟奏臣攻取畧陽隨發兵三路追勦數次
擊敗賊衆共斬六千餘人恢復陽平關

上諭議政王等陽平關逼近寧羌係入蜀之路沔縣亦
與漢中相近今提督趙良棟恢復徽州直取畧陽陽
平關其意或欲進定四川儻不及與將軍王進寶等
共議乘機徑往定蜀則滿洲大兵不可不為後繼茲

事最關重大其檄趣將軍烏丹偕總督哈占速統大兵為進定四川兵馬後應運致糧餉相繼不絕毋使軍機有悞

乙卯

詔安親王岳樂率大兵還京師以固山貝子彰泰代為定遠平寇大將軍

岳樂奏臣等欽遵

諭旨公同酌議每佐領留兵十二人防守武岡州諸處

其每佐領八人前鋒二百人護軍每佐領三人
驍騎并漢軍每佐領五人俱行遣還此遣還之
兵令固山貝子彰泰內大臣阿密達護軍統領
桑額署護軍統領伯郎素輔國將軍宗室瓦山
前鋒統領碩岱副都統伊巴漢署副都統穆森
雅哈喇率往其留守之兵議令實授都統品級
穆占護軍統領拉賽署前鋒統領薩克察巴圖
魯學士薩海都統夸札漢軍都統釋加保前鋒

統領沙納哈副都統託岱花塞襲圖漢軍副都
統祖澤純宜思孝署副都統公沃赫達漢泰沙
禮等統領議政王等議奏頃者大將軍貝勒察
尼每佐領發回兵八人奉

旨每佐領撤還六人今安親王軍前所有滿兵亦宜每
佐領撤還六人大臣官員留者與發回者俱如
王奏

上諭安親王自統兵以來各處立功甚多隨往官兵亦

多効力如王所題令其親率每佐領兵八人還京固
山貝子彰泰授為定遠平寇大將軍以王勅印留與
彰泰令彰泰穆占同心協意商確而行但見在與賊
對壘所撤之兵數雖不多而湖南初經底定投誠之
兵甚衆乘此撤兵之時恐姦宄竊發亦未可定彰泰
等宜熟計防守其間有可行之機務乘時進取毋失
事會已而岳樂又奏岳州今係內地岳州兵每佐領
二人似宜撤還京師

上曰岳州今不必守大將軍順承郡王于在岳州荊州
諸處兵內撥征行在先進勸勞苦者每佐領二人與
安親王率還大兵一同啟行又漢中諸處已經恢復
順承郡王所統兵內若有應發回者速行奏聞

丁巳

詔提督許貞統轄江西全省軍務

大將軍安親王岳樂奏提督趙國祚等老病不
能効力

上諭趙國祚等固屬年老身病不能効力准以原品解任江西既有提督許貞其趙國祚提督員缺傳其補授全省地方俱令許貞統轄速移文趙國祚等與發回大兵一同來京

平定三逆方畧卷四十八

欽定四庫全書

平定三逆方略卷四十九

康熙十八年十二月壬戌朔

命總督蔡毓榮為綏遠將軍

毓榮奏言大兵進取辰龍關必由楓木嶺一路
齊進請專責一人總統之議政王等以蔡毓榮
周有德二人請

旨簡用

上命蔡毓榮為將軍

賜勅諭曰大兵進勦雲貴各路綠旗官兵必需專責一人總轄調遣始克允濟特授爾為綏遠將軍總轄常德武岡等處所有各省調撥官兵及湖廣全省綠旗兵馬聽爾酌量調度前進底定疆圉總督董衛國周有德提督桑額趙賴周卜世俱聽爾節制酌量而行一切平定雲貴及勦撫諸事宜惟爾專責至楚中現任文武官員聽爾遴選賢能攜赴軍前調用如有能

備芻糧克濟軍機及官兵有能首先奪關冒險直入
擊敗賊衆者爾即開列勞績具疏奏聞論功加等議
叙如有臨陣退縮運糧違悞者副將知府以下各官
即以軍法從事其以上各官指名飛章叅劾從重治
罪水陸兵將不相習者爾即具奏酌行更調爾定期
進取恢復地方將破賊事宜密行知會廣西陝西等
處王將軍督提等齊乘機會而行爾須嚴督兵將相
機前進力行勦除毋得遲延坐失時會仍嚴加偵探

毋致疎虞大兵一到抗拒不順者戮之有先被賊脅從即時迎降者俱免誅戮有能擒殺賊渠投誠者分別陞賞須嚴禁兵將申明紀律經過地方毋得騷擾百姓歸順良民加意撫恤爾膺茲重任宜攄忠竭力籌畫周詳勦撫兼施早奏膚功以副朕簡擢至意

甲子大將軍公圖海等奏官兵復興安諸處

圖海等率兵至鎮安偵知賊在梁河關據險拒敵之信即分兵分路率護軍統領烏丹力戰破

梁河關賊營大敗其衆遂進攻洵陽縣偽將韓
晉卿燬營而遁次抵興安州偽總兵王永世等
率衆以城迎降於是洵陽白河漢陰石泉及湖
廣上津縣俱平

丙寅

獎諭安南國王黎維禎

時黎維禎疏稱吳三桂叛後與莫元清餘黨結
連同惡相濟不惟餽賊儀物且為佐辦芻糧交

銳等項賊黨兵馬萬餘潛入臣國為掩襲莫元清罪惡甚著臣謹辦方物入貢慶賀即遣兵追擒莫元清以正其罪

上覽奏曰吳三桂背恩反叛屢邀安南國王繳印投降而王不忘國恩竭忠盡誠不肯從逆今又慶賀進貢可嘉禮部察例以聞

辛未

詔將軍侯林興珠等來京師

給事中莫洛等奏請令大將軍安親王岳樂親
率林興珠來京

陛見

上諭安親王率領林興珠來京其所部兵令賢能官暫
理又

諭凡隨征總兵官及給劄總兵官等非屬要地者該督
撫提等俱遣令馳驛來京朕將親閱酌量擢用

甲戌

詔將軍巡撫傅宏烈率兵進剿

時宏烈先遣叅將溫紹賢等從小路斷賊楓木

嶺糧道請親統官兵進剿

上命議政王貝勒大臣集議議政王等奏言近奉

詔將傅宏烈駐劄省會同理事官麻勒吉等供應料理大

兵糧餉應毋庸更議

上諭傅宏烈欲乘機率兵進剿應如所奏命傅宏烈親率所屬官兵恢復滇黔諸處撲滅逆賊與大將軍平

南親王尚之信將軍莽依圖等協力同心酌量以行
其粵西巡撫事務命麻勒吉姑行署理

己卯趣各路將軍乘機分道勦賊

時巡撫杭愛奏稱進勦四川大兵俱抵漢中日
需糧餉皆於西安鳳翔二府所屬取給但山路
狹隘轉運艱難若止從陸路輸送勢必難繼必
水陸並運庶於軍精有濟宜選賢能道官一員
急赴畧陽兼管船艦由水道運致大將軍圖海

奏稱臣欽遵

上諭以建威將軍印給護軍統領烏丹同署理西安將軍事務佛尼勒分統大兵之半以行又以漢中要地雖有陝督哈占率兵屯駐經理糧餉然滿洲大兵不可不留駐守請于見存半兵內撥發千人令署副都統鄂克濟哈領振武將軍印同副都統恰塔鎮守漢中令鄂克濟哈已赴京師姑以副都統翁愛代之俟鄂克濟哈還日調翁愛往鳳翔臣率將軍王輔臣都

統海爾圖副都統索訥木等亦往鳳翔防守

上皆從之又

諭議政王等曰將軍王進寶提督趙良棟等已定漢中
今又進平四川逆賊敗遁乘此震動之際諸路將軍
等宜各率所屬官兵分進平定疆土如必欲會齊偕
發或姑聽他路先往似此觀望即坐失機宜速移檄
各路將軍毋彼此瞻顧務期努力收輯疆圉

庚辰

詔招撫譚洪

上以譚洪之叛或由迫脅所致令其侄前副將軍譚天

叙齋

勅往撫

勅諭曰爾譚洪昔自蜀中率衆來歸優加侯爵久受國
家養當吳三桂反叛之時爾被其迫脅為賊固守
抗拒有日茲者湖南廣西漢興諸處已經底定各路
兵馬奮力齊進賊勢摧敗殄滅可期諒爾亦所悉知

爾乃深達時命之人豈肯玉石俱焚朕念爾宿將舊
勲夙沐厚恩必非甘心從逆特降專勅詳加開諭恐
爾尚懷猶豫特遣爾侄副將譚天叙前往宣布朕意
爾若果能翻然悔悟棄逆效順爾之前罪俱行赦免
仍優加叙錄至爾標下將士如同心歸順亦一概寬
宥酌量加恩若能獻地輸城厥功尤懋近日各處歸
順人員朕皆赦其前罪論功錄用亦爾所知爾其勉
勵忠忱無懷疑懼以副朕矜宥保全至意

勅諭松潘土司番民

勅諭曰朕撫御寰區恒期中外臣民各得其所綏人之
懷遐邇初無異視爾等俱係世守疆土之臣尤當鼓
勵忠義報効朝廷自吳三桂叛亂以來吳之茂盤踞
松潘荼毒肆虐蹂躪地方困苦已極念爾等皆係國
家赤子今被其迫脅雖素懷忠蓋莫能自伸朕心深
為憫惻茲湖南廣西漢興諸處俱經底定各路兵馬
奮力齊進賊勢摧敗立見蕩平正爾等出離水火之

日不宜坐失機會今特降專勅詳加開諭爾等果能
感戴國恩倡義聯絡執擒吳之茂以獻建功樹績朕
即優加叙錄寵以封爵撰給勅命以酬爾勲庸大兵
到日爾等若相機策應協同勦寇亦爾等之功爾等宜
速乘時會早奏膚功以副朕懷遠矜全至意

壬午

命提督趙良棟為勇畧將軍

時良棟以所屬兵勢單弱請調興安一路兵及

副將楊三虎兵簡選進定四川

上諭平定四川事關重大其所請調興安進征之兵及楊三虎兵俱如所題調發至提督趙良棟與將軍王進寶分兵兩路前進趙良棟授為勇畧將軍給之勅印不拘陝西通省及各處官兵凡係王進寶趙良棟兩將軍所調大將軍公圖海以身任之速為遣發務至彼等所指之地勿致有悞若漫不經意調遣遲延恐悞進定四川重務又隨

諭兵部將軍王進寶趙良棟率兵進定四川其標下官員各加一級

臣謹按帝王之戡亂安民也在乎馭將若馭將克當則戰勝攻取功無不成是時湖南逆寇悉皆奔潰

皇上特敕諸路乘勢進師而秦中將帥尚懷猶豫惟提督趙良棟首請進兵深契

睿算

上意嘉焉因授良棟為將軍且令諸路士馬聽王進寶
趙良棟徵調不使掣肘其部下各官悉各加
一級標兵並蒙賞賚於是二將仰戴

聖恩益思報効各率兵深入收復疆圉其他滿漢官兵
亦由諸路進剿因而逆賊盡滅蜀土悉平原
其所以能奏捷功者皆由畀之爵賞假之事
權策勵鼓舞以致之

皇上馭將之道誠復出千古矣

甲申

詔責大將軍順承郡王勒爾錦

勒爾錦奏臣遵

旨撤鎮守岳州兵每佐領各二人與安親王所統還師

齊發外荊州諸處亦宜撤每佐領各二人但大

兵鎮守要地發回二人頗屬未便今合滿洲蒙

古漢軍共每佐領一人令署副都統敖哈率之

還京

上諭前大將軍安親王請撤岳州兵每佐領各二人已
令順承郡王合岳州荊州兵內察其征行在先進勦
勞苦者每佐領遣還二人與安親王率回大兵齊發
今順承郡王不以勞苦之兵分別撤回止撤鎮守岳
州兵每佐領各二人不合理宜駁察但此兵已行可
如所撤來京

丙戌

命提督孫思克暫駐莊浪

總督哈占奏請西寧總兵官朱衣客調赴漢中
防守朝天廣元諸處提督孫思克暫駐莊浪防

守

上諭漢中有將軍鄂克濟哈駐守朱衣客或令防守朝
天廣元或令進勦四川令將軍王進寶趙良棟會議
酌行甘肅涼州諸處有靖逆侯張勇駐守足資彈壓
其莊浪與涼州西寧蘭州臨洮隣近緩急皆可相顧
即如所請令孫思克官兵暫駐莊浪防守河東河西

諸處

詔西安甘肅巡撫催運兵餉至漢中畧陽

時將軍烏丹奏總督哈占即駐漢中請

勅西安甘肅二巡撫速趣運餉至漢中畧陽

上諭官兵進勦四川輓運糧餉事最重大即如所請令

西安甘肅兩巡撫速備糧餉運至漢中畧陽漢中既

有將軍鄂克濟哈駐守哈占標下官兵酌量留用外

其餘悉聽將軍王進寶趙良棟調用

平定三逆方畧卷四十九